



Broj: 03/1-50-14-7-16- 9/16

Sarajevo, 1.2.2016.

**PREDMET: Informacija o učešću u radu stračne debate o temi: „Jačanje policijske odgovornosti i integriteta: procedure za postupanje u odnosu na pritužbe građana na rad policijskih službenika“, Sarajevo, 7.12.2015.**

Predsjedavajući Zajedničke komisije za odbranu i sigurnost BiH Sifet Podžić učestvovao je 7.12.2015. u Sarajevu u radu stručne debate o temi: „Jačanje policijske odgovornosti i integriteta: procedure za postupanje u odnosu na pritužbe građana na rad policijskih službenika“.

U radu stručne debate iz PSBiH učestvovali su i parlamentarni vojni povjerenik BiH Boško Šiljegović, predsjednik Odbora za žalbe građana Parlamentarne skupštine BiH Vjekoslav Vuković, zamjenik predsjednika Odbora Borislav Radić i članica tog tijela Aleksandra Martinović, kao i Željko Grubešić, stručni savjetnik u Uredu sekretara ZKOS.

Cilj stručne debate, koju je organizirao Centar za sigurnosne studije (CSS) u saradnji sa Ženevskim centrom za demokratsku kontrolu oružanih snaga (DCAF), bio je predstavljanje postojeće prakse i procedure nezavisnih tijela u odnosu na pritužbe građana na rad policijskih službenika BiH u svjetlu novih sigurnosnih izazova vezanih za migracije, radikalizaciju ekstremnog nasilja i terorizam, kao i na nove pojavne oblike organiziranog i prekograničnog kriminala.

Tokom debate istaknuto je da se jedna od bitnih pretpostavki odgovornosti i integriteta policijskih struktura odnosi na povjerenje građana u njihov rad, koje se najočitije manifestira u odnosu na kršenje individualnih prava građana i na mogućnost da se pritužbe građana na rad policijskih službenika procesuiraju na nezavisan i profesionalan način.

Tokom debate rečeno je da je ujednačavanje procedura i prakse postojećih policijskih struktura veoma bitan aspekt u ostvarivanju jednakosti građana na cijelom prostoru BiH. Naglašeno je i to da bi usklađene procedure u značajnoj mjeri olakšale rad unutrašnjih i vanjskih aktera u čijoj je nadležnosti postupanje po pritužbama građana na rad policijskih službenika.

Na skupu se razgovaralo i o zaključcima koje je PSBiH usvojila uz Izvještaj o radu Odbora za žalbe građana za 2014. godinu, a u kojima je istaknuta potreba da Uprava za indirektno oporezivanje BiH obavi generalnu rekonstrukciju aparata za videonadzor, zamijeni stare aparate novim, te da, u saradnji s Graničnom policijom BiH, pronađe odgovarajuća rješenja za problem nefunkcionalnosti, odnosno lošeg funkcioniranja videonadzora na graničnim prijelazima BiH. Pojašnjeno je da je taj zaključak važan jer se veći broj pritužbi građana odnosi na rad policijskih službenika Granične policije BiH, pri čemu je videonadzor ključan pri dokazivanju nezakonitih radnji na graničnim prijelazima.

Poručeno je da je cilj rada Odbora da zaštiti policijske službenike od kleveta i neosnovanih žalbi, ali i da zaštiti građane od neovlaštenog, neprofesionalnog i neetičnog postupanja policijskih službenika. Stoga je, kako je rečeno, imperativ rada Odbora omogućiti pravedan postupak u razmatranju žalbi građana na rad pripadnika policijskih tijela BiH.

Tokom rasprave, učesnicima debate se obratio i Sifet Podžić, predsjedavajući ZKOS.

Predsjedavajući Zajedničke komisije

**Sifet Podžić**

**Dostavljeno:**

- naslovu
- a/a